

周南先生文集

初編
自三至四

和18
1995
2

早稻田大學附屬
圖書館

寄第 一

漢詩文

第 418 號

第 2 卷

此書館外不許帶出

0 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8 9 40 1

和合
1995
卷 2



周南先生文集卷之三

王鼎



山縣孝孺次公

著

男

泰恒伯恒 輯

門人 山縣魯彥子祺 校

七言律

送田省吾使之峽中

東都作

輶車遙發武城東。關外風雲使節雄。路入高山星渚近。棧通深峽地維窮。終軍官就棄繻後。司馬文傳作檄中。北土古多慷慨士。悲歌薄暮動蒼穹。

送倉實操

實操有脚疾

楚客自誇天下寶。陵陽書社卽今開。連城價人諸侯定。貫斗光經列宿來。碣石黃金遊士意。兔園華簡大夫才。河梁新調多悲思。不忍送君登鶴臺。鶴臺地名在灞城東

倉都講有懷壺天園作以書需諸友之和

淡園蔥鬱大江隈。雲氣時從海上來。松塢霜寒玄鶴下。桂巖晝靜白花開。秋虹亘谷天圍窄。西灝滿樓星象回。遊子中原留未至。僊壺寄興轉遲徊。

東都元日

玉帛朝春會上游。和風此日滿中州。黃河若帶周諸國。朱邸如岡漢列侯。嶽雪新含佳氣耀。海潮長送瑞

雲浮。朝來草木多生意。膏澤可知微細流。

東都得弄璋報

尺素遙憑海雁投。報言生子似阿侯。詩書待汝家將世。宗祀有人身始休。旣協熊羆良夜夢。莫貽豚犬異時憂。朝來自笑癡何甚。事事新爲父母謀。

子遷子和子潤伯彥見過東都作

四海吾曹少弟兄。相逢揮淚說平生。延津風雨龍離合。鄴下文辭人晦明。把酒青煙江樹老。捲簾白雪士峯晴。百年無限高陽興。暮色蒼然已滿城。

送賀共昌之東都

灞水橋頭山上山。送君悵望月如環。樽前擊筑歌將別。袖裏贈詩心不閑。蘭漿潮平宵度海。銀鞍星落曉過關。東方一路三千里。飛雁欲迷縹渺間。

贈三島郡宰

海郡孤懸杳冥際。褰帷遙想使輶輕。千燈夕見蒼龍窟。一髮晴望玄菟城。神蹟留幡常有物。仙巖題字不知名。何須帆影兼雲度。自有雙鳧斜日橫。

山崎道中

西宮東去問山崎。日出春雲滿帝畿。河上人家楊柳合。昆陽池水倉庚飛。風塵萬里身將老。弧矢百年心

事違。平野蒼蒼鴻雁落。鞍頭回首轉思歸。

三井寺登覽

何來天地動玄陰。落日樓臺試一臨。秋入九江波蕩漾。雲連三越氣蕭森。湘靈鼓瑟思無盡。楚客行吟恨竟深。不識關門風雨夜。幾人操曲遇知音。

函關

關門百里倚龍嵒。十二東秦車轍通。天色幾餘黃霧外。人家半住白雲中。湖分銀漢星辰湛。峰並芙蓉冰雪同。一自終軍棄繻入。于今士氣此間雄。

次韻實操東都見寄二首

夙聞清望冠江左更有何人第一流飛蓋追隨西苑
夜銜盃睥睨北溟秋彩雲翻座禰衡賦明月滿天王
祭樓還憶壺園高會夕風搖瑤草似仙遊昔與實操諸人遊于

兒玉氏壺天園

河梁握手悲歌起猶自瀟瀟菽水流玉樹風寒仙吏
夢金莖氣爽漢宮秋孤雲一片雁橫海明月千門人
倚樓莫問故山叢桂色爭如才子占豪遊

清樽既屈鸚鵡裘醉態自誇山簡流座映長岨青嶂
色歌成梁甫白雲秋瓊枝夕折江邊樹羽客朝逢海
上樓還在人間不可厭煙霞何必掛冠遊長岨在秋府東

呈朝鮮李東郭十首

萬里長風破浪來儼然高興滿蓬萊世間瑚璉原尊
器天下梗楠自大材策對春深威鳳殿高麗時所賦成
秋冷觀魚臺高麗李穡作賦乘時王者登賢俊雲閣丹青次
第開

濯纓滄海扶桑渚冠冕近天多瑞暉紫氣東南星宿
指浮雲西北帝鄉歸文才司馬堪辭命經術寬饒布
德威遙憶平臺分簡日遠遊雄賦和章稀
彈冠鄴下稱才英此日南朝傳大名拄笏優遊山水
色登樓睥睨古今情朱宮絃管降玄鶴碧海旌旗躍

赤鯨詩學尤堪作辭命星查萬里瑞光生

儀文間雅進賢冠人物上流飛鳳鸞月淨西園携翰

墨春淡東閣委紳輦握中玄璧秋霜耀匣裏赤刀星

宿寒安得凌雲鴻鵠翼與君交義結芳蘭

四牡駢駢客路通秋天持節洛陽宮珣玕價貴東方

美絃管治隆南國風月詠臺中引崔子佑神館下見

金公文章本謂千年業況是他邦名獨雄崔文昌金文烈共以此

文翰之任奉使中華為知名之士月詠臺致遠遊賞之地佑神館南宋館蕃使所富軾嘗舍於此

遙觀海上五雲開忽有乘槎使者來鼓吹入風天際

滿旌旗映日水中回明時不問梧宮對清署尤望鄴

下才自是壯遊堪蓋世太陽升處接蓬萊

冠蓋遙臨滄海圻箕邦猶自耀周文豐京遠弔天

皇日瓊島忽觀仙侶雲氣滿南方珠蓋秀秋來北地

桂枝芬書生欲擬賢臣頌請獻仁明大國君

秋風萬里送輶車銜命誰當趙相如天下共傳和氏

璧漢廷殊重董生書宦情紫闕馳長夢鄉思白雲盈

大虛振古王門才子湊若君自可曳長裾

明王遙聘嘉鄰國玉帛辭令屬俊雄海表大音賢者

識周家遺禮舊邦隆凌雲高興蓬瀛外蓋世奇文日

月中西缶東琴今不論雙鳴韶濩奏秋風

釜山鎮古瑞雲蒼一夜星軺指渺茫日遠扶桑天色
嫩水來滄海地維長雄風南國裁新賦落月西方向
故鄉男子平生懷遠志看君文旆曝秋陽

和朝鮮李東郭韻

四牡停鑣赤馬關一逢相適紙毫間垂天鵬翼過秋
海帶雨龍旌出曙山曲裏郢歌飛白雪老來仙骨覩
朱顏二三酬唱情無盡不識何時更得閑

席上和實操

芸館秋高夜宴開揮毫麗藻照瓊盃一雙玄壁含風
露百尺蒼松擁薜苔南國雅音盈耳發西山爽氣撲

顏來任他醉態玉山倒此興因君轉壯哉

集田詮之江亭得江字

亭子巋然俯大江清流澄徹夕淙淙波平素練渾千
頃月白明珠共一雙從古悲歌多楚調祇今才子滿
周邦把盃此夜莫辭醉看爾壯心終不降

登愛宕山二首

自是神僊不可求瓊樓玉宇漢霄流中天雞犬陰陽
變下界塵埃日夜浮古木遙街滄海氣連山欲盡白
雲秋還疑羽化凌空去四顧渺茫寰宇周
馮陵翠色對天台此日秋風萬里來雲盡九霄明象

緯煙橫三輔。簇樓臺。山深紫合。真人氣。海遠黃冥。濁界埃。自是登高多。賦興世間幾。見大夫才。

登叡嶽二首

遙望衆星樹杪懸。樓臺近接北辰前。王畿南去山如浪。海甸東來湖有煙。下界時時過雷雨。空林往往見神仙。極知真境生真氣。只是雲霞不可牽。

飛樓傑閣架中天。落日登臨思杳然。三輔河山環赤縣。五陵風雨入秦川。霞標倏自巖邊起。月色已從林外圓。七十封壇何處是。諸峯鬱勃出雲煙。

三河道中

四海騷然爭逐鹿。誰知大業待英雄。山川尚遶蕭曹宅。雲氣猶深豐沛宮。解道黃河應若帶。何爲白日竟遺弓。童兒不識力安在。陌上相携歌大風。

鎌倉覽古

湘水煙橫返照明。關河空鎖霸王城。海邊驅石人先老。山上填溟鳥自鳴。百里停雲總殺氣。一林高樹皆秋聲。可憐孤鶴歸華表。猶傍北岡飛晚晴。

哭滕東壁

中野哭君流涕沱。誰知身世共蹉跎。斗邊光盡雙龍氣。隴上悲餘五噫歌。商阜晚陰雲黯淡。吳門夜色月

婆娑可憐。明日茂陵道。空問遺書使者過。東壁卜築。白山自號。

商山又余與東壁事祖。徠先生于吳門邸中。

懷江州松子潤東都作

昨夜飛鴻度漢宮。宦情重駭落梧桐。懷人徒切流年感。撫夢誰禁明月空。遊士于今多美口。大王何處當雄風。楚山聞道饒雲雨。賦就猶淹朝暮中。

送順菴平君告病西歸君浚於禪

武昌明月滿南樓。興淺還將印綬投。雨散湘川秋色動。雪寒蓮嶽暮雲愁。宦情瀟灑思三徑。歸計蕭條携一裘。摩詰禪浚多病後。知君妻子世緣休。

寄江山人

幾年林下閉空關。白眼紫髯觀世間。無客背山廬阜去。有人乘月剡溪還。絕交欲已書終寄。潛論翻羞名未刪。會向風塵憐舊識。何妨郢曲杳難攀。

秋懷

秋風昨日著枯桑。殺氣蕭條總可傷。片月城頭烏夜宿。孤雲海上鴈南翔。朱絃思遠悲流水。白石歌愁動素商。卻似河梁携手夕。沈吟徹曉不成章。

送江宗鑑之東都

春城日永百花斑。客擁驂騑鳴玉環。祖帳光輝多俊

傑懸孤意氣滿區寰柳邊朝涉藁科水月下暮過鈴
鹿關五十三亭行不盡回頭雲霧隔鄉山

期友不至 東都作

西峰寒影晚馮陵白雪當樓獨自凭玉笛誰家雲欲
過金樽此夕月俱澄新豐夜色煙爲樹長樂鍾聲星
若冰似是山陰廻棹去知君高興重難乘

吊滕隆政喪偶時余亦有鼓盆之傷

聞道秦樓鳳不歸孤簫夜夜吊羅幃月留空閣思來
去雲遶寒山夢是非絃上殊無彈後韻篋中猶有縫
殘衣又拚莊叟鼓盆興羞使旁人窺瘠肥

新正懷東都服子遷

公侯玉帛會三元此夕東風萬國暄紫塞雪殘寒氣
變金城日上瑞雲屯韶華將借彩毫動遲暮祇應素
瑟存遙想長楊遊獵後相如猶爾臥文園

丁未秋從物先生泛舟墨水群賢皆會詩酒從
容時余將歸養乃有一爲參與商此遊夢中過

句明年先生易簣數語遂爲永決之讖後余再
來東都經泛舟之地其處在其人無悽惻流涕
賦此漏餘哀云

風悲木落水波深此夕招魂何處尋宛若有人林靄

暗。倏然爲雨暮雲沈。祇今徒聽山陽笛。幾日俱亡床
上琴。唯是桓譚無信讖。寧知衝突斷肝心。

十四夜諸才子集子遷芙蓉館賞月余以羈絆
不得與焉附田子高寄此二首

清賞不堪良夜過。捲簾獨酌且高歌。雄風唯許芙蓉
秀。明月還將蘿薜多。露灑深叢鳴蟋蟀。潮來幽窟起
龍鼉。空聞漢使經星渚。一葦相望阻九河。

月明露苦落梧桐。東望側身憐去鴻。醉態無人。不玉
樹。琴心有客寄蘭叢。簾前素影嫦娥下。檻外紫雲仙
子同。南郭蓬蒿淡若許。清暉偏瀉廣寒宮。

中秋東都作

琴書幾歲異鄉隨。孤月東州似舊知。一片冰心兼比
玉。三秋蓬髮轉如絲。臨風欲擬謝莊賦。顧影重懷宗
玉悲。但許瑠璃雲際色。故園千里寄相思。

岡稱水久宦於東都國邸以大孺人老病上疏
歸養且輿疾就途臨發惠詩次韻贈別二首

黯淡西山落晷幽。伊人陟屺厭東遊。陳情字字悲難
漏。采杞章章思未酬。結束年深斷機教。瞻望日切倚
門愁。大邦爲治多仁政。孝子不違萱草秋。

有客揮鞭東武城。家山千里問前程。孤雲天遠宦途

怨落木風寒遊子情。嶽雪近迎龍劍。霽海潮更送布帆平。莫愁臨路河為崇。融洩賦時身總清。

遊越君瑞懷仙閣

高閣嵯峨峙海東。登臨此日對秋風。五雲掩映蓬萊外。一鳥飛過縹渺中。凭檻襲衣空翠濕。開尊當座晚霞紅。欲携真訣人間去。多恐烟塵中路窮。

登摩耶山

號切利天上寺

真是人間切利天。望中世界且三千。東南佳氣扶桑起。西北浮雲弱水懸。繞閣法燈搖象緯。迸空梵唄駐神仙。到來還怪挾方術。鳥道纔從樹杪旋。

神武門晚眺

東都東門

神武門前泗水橋。晚晴立馬倚青霄。煙不盡常陽樹。風雨忽來房海潮。天際金莖花欲雨。池邊華表鶴方飄。江關詩賦近蕭瑟。愁見飛鴻入沈寥。

羽林中郎將小倉滕公。千里辱書兼賜盛什。見

徵拙業賦二律酬盛意

漢室宮牆北極邊。未央宏麗紫霄連。瑤弧星動中郎將。玉几雲從聖主年。瑞鳳凌虛難可接。明珠投暗轉相憐。淮南叢桂近蕭索。誰道小山能著篇。閭巷歌謠久不揚。雲霄遺響尚洋洋。虎賁風采高諸

衛環列星文耀建章。月滿關山天共白。秋來湖海夜偏長。巴人自愛巴人調。何意陳觀遍遠方。

周南先生文集卷之三終

周南先生文集卷之四

長門山縣孝孺次公著

男 泰恒伯恒輯

門人 山縣魯彥子祺校

五言絕

秋風

中宵嘶櫪馬。蕭颯鳴枯桑。此聲慘不散。遊子鬢為霜。

贈熊生

四海皆兄弟。誰如熊子賢。腰間一寶劍。仍解向君前。分賦兒玉氏壺天園十六景得二題

又玄橋

既躔衆妙境更度又玄橋橋上紫煙起日闌猶未消

靈禽欄

秦臺有仙史吹簫長不沒將爾雙鳳凰來向壺中月

歸思四首

東都客舍和龍溪

何若長安客忽忽花柳時不愁春色過日日問瓜期
重向長安路長安佳麗春行行逢馬上不是舊知人
欲折章臺柳已無年少顏桃花當白晝亂落委前灣
春風街陌上日夜自東來忽入潘郎鬢二毛生鏡臺

分和歌題得秋日雜興應命

昨夜梧桐落今朝鴻雁歸秋風吹不絕滄海白雲飛

宿鳴海驛壁上有詩乃故山原欽少年之作悵

然次韻

玉樹久槁落鬱爲泉下塵唯留若花字擘擘四十春

題釣叟圖

未遇周王出還辭漢主歸終年釣不得生計初來非

等仲子從南塘先生學丹青早有韓幹之譽不

幸失明詠歌自娛其所居號聽松菴介人求作

其詩

人道花如錦花飛空後庭松風能洗耳不吹亦常聽

訪涪溪隱者

青山餘一路。茅屋傍溪雲。忽悟隱遁意。欲同麋鹿群。
七言絕

江南春

吳王置酒姑蘇臺。臺上春雲暖不開。楊柳如煙江水遠。西施手捧琉璃杯。

東都喜海北君至

關門紫氣自西開。大野風雲檠戟來。列國何人尤得士。三千珠履下高臺。

駒嶽

神仙蹤跡見須臾。十二樓臺忽有無。帝子朝天駕天馬。猶餘紫氣繞星樞。

戲贈宮生歸鄉 東都作

江上春風芳艸濃。翩翩匹馬指芙蓉。好行紅粉樓中月。不似十年羈旅逢。

少年行

東風驕躍翠麒麟。三尺珊瑚手裏春。樓上吳歌聞不盡。前人先到小平津。

秋日喫橘因懷家園愴然

黃金珠子自龍宮。曾落人間霜後風。袖裡芬芳吹不

去夜來長夢向雲夢演史稱東方橋子種出龍宮

寄田山河通習

秋色蕭條滿海城。高樓眺望動哀情。故人遙在田山下。天際無雲一雁鳴。

東遊四年已丑元日始奉庭闈春事

東海煙波西海春。無端裘馬向風塵。四年書劍多豪氣。那若斑衣日影新。

元日與同僚會于洞春寺待朝期

紅雲萬里日華開。春色微茫滄海來。自是大夫堪作賦。元朝先上妙高臺寺有妙高臺

送清光寺柏溪師之京二首

杖錫乘春向洛陽。天高一葦海潮長。煙波諸島東風日。舉手忽披雲錦裳。
鶯花三月滿皇州。日夜絃歌下翠樓。和雅妙音人不識。紅塵繚亂九衢頭。

送關泰之之東都

三月蒔江楊柳春。送君來往更頻頻。別離原自非難說。恐使壯夫還濕巾。
赤間客舍和艸中章旅亭感懷
他鄉更恨雁聲孤。夢裡江山忽有無。開戶靜觀波上

月何知不是平安湖中章家在秋府平安湖上

次佐玉淵和艸中章韵兼寄中章

高樓臨水似乘舟。月色無邊滿海州。誰奏雙鳴鳳凰

調。夜來振起赤關秋。正德元年祗役赤馬關感秋風之起愀然作吊

古八首

海天秋色遍豐東。落日蕭條滿目空。天子西巡終

不返。鑾輿長在水晶宮。

一族朱輪三十餘。平家去國闕廷虛。丞相無言謝天

下。強懷幼主海西徂。

宸宮北在紫微雲。內裏蕭條海色分。天子幼种何

解事。侍臣猶奏水鄉君。內裏地名在豐前州即文治行宮所

勇冠三軍源廷尉。關東將士總貔貅。上皇非不憫

孫帝。平氏自為天下讎。

六宮粉黛良家子。三月觀花內苑春。誰識秋風西海

路。錦衣狼藉赤關濱。

欲問水濱煙霧流。潮聲薄暮滿山樓。君王不與朝

廷事。一一凶臣自結讐。

詔旨空傳西土兵。羽林將校悉諸平。鑾輿玉輦無消

息。滄海茫茫風雨聲。

息。滄海茫茫風雨聲。

息。滄海茫茫風雨聲。

息。滄海茫茫風雨聲。

息。滄海茫茫風雨聲。

多少墳塋蒼野分。松楸猶傍九疑雲。秋風不盡行人淚。浩浩煙波暗水濱。

赤關賓館。呈朝鮮書記嚴漢重。

正德辛卯。朝鮮來聘。吾藩館諸赤馬關。余與

同僚諸儒。承命就館。詞翰贈酬。其製述官李

礪。掌書記洪舜衍。嚴漢重。南聖重等會接矣。

明年壬辰。歸路之會。亦有詩。凡四十五首。書

牘。筆語若干首。及韓人所著。後並梓行。京師

有鷄林唱酬集。東都有問槎崎賞。共行于世。

赤馬關西玉樹秋。長風吹送木蘭舟。誰知海上蓬壺

月。總入詩人曲裡流。

同前和洪鏡湖示韻

箕域猶存大雅音。諸君絕調響寒金。相逢何恨清談

背。揮筆傾來一片心。

同前和南泛叟韻

何知音吐不相同。意氣交投翰墨中。忽見鏗鏘金玉

散。風聲激烈滿蒼穹。

同前呈李東郭

關門紫氣接銀河。帆影如雲使者過。誰奏陽春充海

國。秋風散入棹郎歌。

同前重和泛叟次前韵所示

二域千年臭味同。從遊最喜俊英中。還思離別在朝暮。孤月空留照大穹。

同前呈洪鏡湖八首

關門忽遇棄繻郎。意氣相投天色涼。一見自堪高友義。蘭風滿袖竟難忘。

使臣銜命杳相嘉。大拔英材耀國華。總為名聞轟遠邇。枉令謁刺滿征車。

王門軒冕急求賢。諸子翩翩國士前。為許四方堪作命。知君勲業照凌煙。

登高作賦大夫才。更覩樓船橫海來。天下美名誰得比。千秋竹帛為君開。

鴻雁南飛秋色寒。使臣滄海見波瀾。朝廷列爵文官貴。奉命歸來向大韓。

烈士平生意氣高。方臨危險見英豪。海濤八月如山嶽。傳命東來擁節旄。

記室文成照碧空。府公何得病頭風。升平僚屬自無事。到處詞章滿海東。

專對四方推俊賢。尤看書記本翩翩。調高白雪誰能和。水國霜飛九月天。

同前次雨森伯陽惠韻二首

對馬書記

錦里文壇氣若虹，相望諸子悉英雄。卽今隆運光華

遠，振起東方大雅風。

伯陽師木順菴號錦里

豐城劍氣動長虹，神物堪稱四海雄。自是人間不難

望，秋高天際起西風。

同前呈李東郭

湖山風雪幾詩篇，東道主人誰最賢。更惜鳳鳴聞不

久，翻飛明日白雲邊。

同前呈嚴龍湖

黃鵠長飛萬里翔，白雲何處問歸鄉。高歌一曲西山

暗，不是陽關亦斷腸。

同前呈李東郭一首

紅燈徹夜笑談中，相向總忘西與東。赤水雪花飛似

羽，誰知此際坐春風。

思君不見且登山，欲折瓊枝塗更難。紫氣漸從東北

轉，春風先至赤間關。

同前答十洲見和對馬人

幾時君去十洲中，猶滯狂塵在日東。今夜偶然來小

會，青樽開處揖仙風。

同前呈正使趙平原 名泰億字大年

龍節遙臨滄海隈。倚樓兼有使乎才。誰知箕域奎星彩。還照扶桑萬里來。

同前呈從事李南岡名邦彥字美伯

豐城春色雪紛紛。喜見樓頭五彩雲。欲寫一時知遇感。短篇慚愧不成文。

同前。朝鮮二使席上。出示瓶梅需詩。押以梅開

盃字

赤水橋頭一樹梅。却從瓶裏趁春開。分明認得東君意。要照嘉賓夜宴盃。

前夜東郭筆語曰。足下諸詩。正使相覽之極。

加歎賞。欲一接清儀。早晚當奉邀耳。翌日遂

接見焉。前二首以充贄儀。後一首應其需云。

使者務自保嚴。此行官儒外得接見者。紀藩

祗園與一及余二人而已。見於森伯陽筆語。

醉後和倉孟節

意氣相酬大醉中。豪談爲爾貌王公。揮毫忽欲乾江漢。拂席吹來天際風。

春日送人之京。分得雲字。三丘君集

江城花落日紛紛。此夕絃歌醉送君。飛雁能傳胡地帛。不知幾重上林雲。

肉戶氏後亭八景分得渡口晚眺

橋上一條高水煙。青山遠近隔江連。東來白馬誰家子。相遇翩翩落日前。

阿川君景福樓十景分得玉江秋月

一碧瑠璃凝不流。波光始白月盈樓。笙歌忽入西風起。人住廣寒宮裏秋。

曉行

河上秋風曉轉寒。無端馬首向長安。方怕清霜侵客鬢。商量前路更漫漫。

林祭酒宅同賦庭樹發春輝

樓臺雪霽映霏微。簾外東風黃鳥飛。應為庭階生玉樹。滿園草木著光輝。

關山月二首

大漠黃昏望轉迷。鐵衣如水北風淒。斷腸今夜關山月。也向長安照玉閨。
秋風俄入玉門關。月色如霜滿四山。羌女不知征戍恨。吹笳一夜徹雲間。

邸中集山龍溪舍次主人韻

落日樓臺樹色閑。羈思萬里滿雲間。金樽暫就山濤醉。不問琴書向翠山。

送金生

海上層陰春色寒。送君相報碧琅玕。東風莫駭王孫草。生死無端離別難。

戊戌冬。從海北君館于山口。酒家松本宅。松本

請詩賦。此留贈三首。

軒車暫駐竹林傍。醉對青山爽氣長。不見汝身帶銅

臭。黃花滿苑似柴桑。

松本愛菊

雞狗依然霸國墟。高樓日霽寄行厨。壚頭如不儲良

醞。何得淹留公子車。

風流賣酒華陽人。過飲題詩醉若春。好爾千金稱厚

富。還能筆翰屈詞臣。

豫州齋宮洋中遇七夕

不暇樓頭謀乞巧。乘槎夜半度滄溟。秋濤浩渺連銀

漢。恐使人間驚客星。

哭東壁二首

此夕商山人不棲。中霄如雨殞文奎。茂陵無問遺書

使。獨有文君夜半啼。

公車辟命拔英雄。還向柴桑醉菊叢。不妨當時多側

目。何人竹帛記高風。

庭上月。應命和歌題

八月秋高風露涼。南庭半夜白如霜。清暉不鎖廣寒殿。多在瓊枝瑤草傍。

胡笳曲

雁影秋高青海波。飛狐城上月婆娑。胡笳吹斷悲風遠。是自長安西北過。

東都元日二首

乘車侯伯玉珂鳴。騎馬大夫雕戟迎。今日春風盈海內。上林鶯子一番聲。
嶽雪遙懸天際寒。都門羈客捲簾看。東風吹冷屠蘇酒。欲頌太平猶未餐。

擬早發白帝城

白帝城頭曉霧開。江陵歸客片帆迴。回頭欲問黃牛峽。已見章華古郢臺。

和田叟客中行

秋風夕起白雲清。醉聽胡姬琴上聲。羈思三年腸欲斷。請君莫說洛陽城。

歲首次韻倉實操遙賀世子元服之作

城闕春回日影高。蓬萊風暖送波濤。漢庭賓禮諸侯貴。世子初冠寵黑袍。

於麻丘世子宮應命賦山花未遍

和歌題

湖上春雲凝未開，山花晝靜雨中催。韶光非向林端薄，是自南邊次第來。

積中作

萬里風霜夕，轉寒沙中立。馬望長安，長安宮闕高如日。水遠山遙不可看。

陪烏田子遊海北君別墅

有客惜春河上樓，琴樽終日倚清遊。溪雲惹雨來相送，醉見山花濕欲流。

登國廣邑南山亭子

高亭日霽眺望開，百里蒼然暮色來。島嶼渺茫看不

盡翠煙多在鳳洲隈。

訪江山人於嵯峨不逢

洛中耆舊徧相尋，聞道嵯峨人鼓琴。流水青山秋欲老，衡門晝鎖白雲深。

春日麻丘懷故祐巖世子

西園春色日氤氳，花落禽啼殿閣薰。借問笙歌何處是，斜陽黯淡緱山雲。

徂徠先生與諸才子見過

城頭春色花如雨，落日逢迎車騎停。却恐漢宮驚大史，明朝百里奏文星。

上徂徠先生

先生善笙

幸值蒼生樂太平。春風終日坐吹笙。朝陽采羽人皆
觀。何妨更爲雄雌鳴。

陪徂徠先生同諸子泛舟分得天字

樓船簫鼓下晴川。人醉白雲秋色天。詩就瀛洲飛玉
笛。奈何明日世間傳。

東都得坂生在洛報花信書却寄

聞說長安花似錦。芙蓉峰北月如霜。千山萬水同爲
客。萬水千山共斷腸。

贈岡家昆仲

伯氏吹笙仲氏笛。千秋江左占風流。歸時莫傍青溪
弄。今日難逢王子猷。

席上呈東厓伊君

百歲垂帷俯授經。生徒四海鬱盈庭。雲煙無限終南
色。遙接京華日日青。

席上呈伊長英

長安豈特衣冠貴。自古才華滿上游。況復君家兄弟
衆。縱修五彩鳳凰樓。

中秋夜應命同賦月出山和歌題

碧落無雲秋色澄。青山有月露華凝。今宵萬里同清

賞那若平臺授簡登

長安道

大道花明佳氣浮。彩雲朝遶鳳凰樓。五陵冠蓋繁華子。玉勒金鞍滿帝州。

東都送平子和之參州

休唱陽關三疊詞。陽關三疊不勝悲。送君多馬河邊柳。折自南枝至北枝。

雲夢公宅小集二首

白雲長傍高人落。秋色還隨遊子來。不擬懸冠神武去。與君終日對銜盃。

退朝潦倒世情疎。得與諸侯遊客居。落日樓頭人醉後。芙蓉白雪散清虛。

越君瑞懷仙閣再成

聞道仙人海岱間。雲霞日夕十洲還。金莖猶有相如渴。重拂高樓向遠山。

奉和南野大夫牛糞橋作

宮城之野秋如錦。錦映晴川波浣花。若使此橋曾在蜀。少陵流子早移家。

關清水

幾歲清華開鏡光。重來立馬照行裝。關山一夜寒如

許不識總爲雙鬢霜

爲故海北君勒碑于萬年山中
中秋夜遇雨

琳宮黯淡闕秋陰
明月收光樹影深
無奈今宵峴山
淚爲雲爲雨散空林

桃源行題栗山孝庵太隱齋

洞口歸來向故鄉
桃花流水兩茫茫
唯看終日銜杯
坐知是桃花流水傍

贈筑州拙庵上人

振錫飛過紫海雲
長山周水指頭分
主人有酒名桑
落何妨淹留終日醺

明月歌中秋夜作

江南一夜競紛華
滄海秋高雲不遮
羅綺能留明月
色清光偏在莫愁家

栽芝館集

夜靜園林浮瑞雲
風清高館紫芝芬
玉杯擎出煙霞
色彩箋分來星斗文

春日送人之京

七陵花柳氣氤氳
日見鳳凰翔五雲
帝寵詞臣天下
召卽今才調孰如君

夜從草君飲居山

春雨蕭條祗樹林。百花香闕夜陰深。遠公早許淵明約。不妨廬山社裏心。

寄賀少發從大夫之須沙

聞說嵩山獵始休。歸來置酒海門樓。孟嘗賓客多賢俊。今日何人居上頭。

遊仙崎寺氏石樓

青山遶海白雲陰。多少樓臺花作林。了卬出迎顏似玉。仙家酬酢紫霞深。

同前宿芸中繼君宅

四面春雲罩海鄉。芸窗晝靜杏花香。方知身在蓬壺

上三日清遊興未央

同前題佐藤醫隱碧桃園

欲携妻子泛蓬瀛。又愛僊崎雲水清。風暖春園芳藥草。碧桃留得東方生。

中秋同賦月光映露應命和歌題

三秋清氣凝爲露。十五夜中烏鵲枝。月影映時渾似玉。玲瓏萬顆拂簾垂。

謝竈島田秀才惠海參

海崖爲吏日彈琴。珠去珠還歲月深。不向山中求五葉。潮心亦自有參

十四夜青松館集子恭不至得十五刪

月色西園滿四山凭欄終夜照酡顏佳人隔在彩雲表鳳管不知何處還

同前青松館集懷子泉得先韻

海濶天空影始圓南樓此夕挾飛仙清風朗月無玄度見月臨風轉悵然

鄒郎君子舍即事

滄海潮生萬木鳴東山月出一樓明樓前千畝平如野夜靜近聞群鶴聲

李八子求作東僊菴詩曰其人善俳諧歌市南

環堵蕭然如山居座無雜賓所與語者五六人

亦皆求羊之徒旁無長物盆池植石而寓山水之興余未識其人為李子濡毫云

曾笑壺公跡未真自稱東海浪仙人盆池長對蓬萊島終日垂簾避市塵

赤間關望山樓詩

海上起樓不望海而望山其蓬萊耶蓋託遊僊之興其詩云

海崖臨海倚高樓日見五雲波上浮白鶴雙飛何處是蓬萊僊子下瀛洲

山口方神士之京。日謁宗伯問方賦。此贈別

祈年觀北峙。金莖五時雲。浚丹鳳城。聞說神山似三

島。知君日日摘芝英。

滿行蘭若送僧還長安

風雨蕭蕭古梵城。相逢相別總多情。歸舟明日長安

路。到處笙歌花裏迎。

竺尊者千里命駕見顧草廬。次其韻奉謝

寂寞自甘楊子廬。玄成身後幾多餘。門前春草浚如

許。何計還回長者車。

從軍行

曾從驃騎出居延。歸日將軍賜第年。不恨降恩有差
等。自期功在萬人先。

次韻示竺尊者

從來老骨不堪鞍。矍鑠自驕杯酌歡。醉後憑君操白

雪。縱他西北暮雲寒。

送栗文仲之京

河梁握手醉相分。水遠山遙日暮雲。客舍洛陽留幾

歲。誰知座有長桑君。

應命題雁胡枝花畫

秋風晒錦胡枝花。塞雁將翔回影斜。海上可憐救紙

者。帛書今夜宿煙霞。

隣松庵詩

新淦人自稱隣松庵

三十六街桃李春。家家日夕管絃頻。誰知寂寞新淦上。獨使松聲不涿塵。

元日題扇面畫

王母園中偷菓兒。春風戲笑傍丹墀。歲來歲去人間日。栽子著花知幾時。

歲初三日別野大年

行騎乘春去。競春津頭樹色歲華新。慙慙好往東關路。到日鶯花不負人。

送原季麟之東都

駐馬重看杜曲花。君山三月霽琵琶。離家萬里羈心壯。白雪峯寒東海霞。

或求翻花勾引比良乃山風吹爾計利漕行船

乃痕見由留末天和歌為詩戲作

花發比良攢白雲。風來湖水雪紛紛。一線長光如素練。方知漁老鼓槳分。

又翻今日不來波明日波雪登曾降奈末之不

消波在登毛花登見末之乎

櫻花開徧今為盛。願繫君駒醉紫霞。明日山風掠春

去。縱然看雪不看花。

送秦子與歸省嵩山

故人家在嵩山雲。一峽猿聲夢裏聞。歸省更逢花發日。知君不混酒徒群。

古意

雲來雨去竟茫然。臨水登山何處旋。解道九嶷如黛色。今朝依舊隔湘川。

送田季三入京

才子尋春入帝京。日暄雲裏百花明。有人能作三都賦。何惜與成儉父名。

周南先生文集卷之四 終

國語不文其書之四

其書之四

其書之四

其書之四

其書之四

其書之四

其書之四

其書之四

其書之四

其書之四

其書之四

